



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10

Olympic Games 2024 nung breakdancing bendenlok: Thomas Bach

TAPAK 7

Shiv Sena-i kodanga farm laws pumasem: Sanjay Raut



VOL. XVIII NO. 61 (ADOK 61) DIMAPUR

RASEMNÜ (WEDNESDAY) LUCHII (DECEMBER) 09, 2020

₹ 5.00

Nagaland nung Dec 11 nü medical services kar shibangtsü

Dimapur, December (TYO): Centre sorkari Ayurveda doctor tem nem surgery agidaktsütsü telemetba agiba anema Indian Medical Association (IMA)-i noktakba nung Nagaland In Service Doctors' Association (NIDA)-ia pusema nungitba metetdaksüogo.

Iba nung ajemdaker December 11, 2020 anepdang 6:00 ako nungi

nikongdang 6:00 ako tashi Nagaland state nung Non-Covid aser non-essential medical services shibangtsü, ta NIDA President, Dr. E. Phyantsuthung aser Jt. Secretary Dr. Thomas Keppen nati sangdong ka nung metetdaksü.

Ajüsüaka, iba anogo Covid dak sendakba aser tanga emergency medical services meshibangtsü, ta NIDA-isa metetdaksüogo.

Dec 10 nü Covid-19 vaccination atema senden ka amentsü

Dimapur, December 8 (TYO): December 10, 2020 nü Covid -19 vaccination atema senden ka amentsü ta Principal Secretary Health & Family Welfare, Amardeep Singh Bhatia, IAS-i metetdaksü.

Dec 10 nikongdang 1:00 ako nungi IDSP conference hall, Directorate of Health & Family Welfare, Nagaland Kohima nung sendenji amentsü. Anungji iba senden nung bangdak ketdangsertem adentsü mepishia metetdaksüogo.

Dimapur nung Dengue wara mali

Dimapur, December 8 (TYO): Dimapur nung tawa nisung aika dak Dengue positive putetogo ta asüba osang ka ajanga nisungtem tsübuteper saka tanü National Vector Borne Disease Control Programme-i iba osang jangshitsüogo.

"January 2020 nungi tang tashi nung Dengue indang sample 8 tendang aser iba nungi nisung ka dak dang Dengue aoiba putet. Elisa test ajanga dang Dengue positive kuli agütsür aser iba ya Dimapur District Hospital aser NHAK Kohima nung dang lir," ta Addl. Director & SPO, NVBDCP, Dr. I. Talitemsula Jamir-i ashi.

Dimapur district aser temeket nung NVBDCP-i ita shia dengue vector study agir. October aser

November ita Dimapur nung dengue merla asadangba nung kanga ajema aliba bushiteta lir, ta laisa ashi.

Dengue merla ya tzü tamajung atsügendendak alir anungji nübortemi pei ki aser telongtet nung flower pot bases, empty vessels, coolers, tyres, buckets amala mayutsüla.

Tzü tatena ayuba ajak shibanga ayutsüla aser plastic cups, old containers, tyres, coconut shells amala mayutsüla.

Anüngdang aser anong mejangdang merla sù amshitsüla aser mashisa aliba tetsürtem aser tanurtem balaka anepalutsüla. Maneni, temang kanga metaa shirangra doctor den asüngdangya asütsüla, ta Dr. I. Talitemsula Jamir-isa ashi.

NEnung ozüngi memelaba mozü timtiba apu



Manipur nung Assam Rifles, Manipur Police aser Narcotics Control Bureau-i Moreh jila nung mozü shibelenertem apuba sülen agiba noksa angur. (Imphal, December 8)

Imphal, December 8 (Agencies): Manipur nung ozüngi memelaba mozü Rs 165 crores alang shi puogo aser iba ya Northeast nung mozü timtiba apuba asütsü.


Assam Rifles, Manipur Police aser Narcotics Control Bureau külem telok kati Indo-Myanmar arrtsü anasa aliba Moreh jila

nung tesem ana mita aodang mozütemji apu.

Iba dak sendakba nung Myanmar nung 2 dener nisung 6 tashi puogo. Iba mapang pistol ka den injang dena apu.

"Intelligence osang tejangja nung ajemdaker iba mapa ya inyak" ta Assam Rifles-i metetdaksü.

COVID-19 Nagaland: Nisung 61 dak putet



Kohima, December 8 (TYO): Mongulbarnü Nagaland nung nisung 61 dak COVID-19 aliba putetogo aser parnok züngsema nisung ajak agi 11,479 kümogo.

"Nisung 61 dak COVID-19 aliba putetogo. Parnokji Kohima nung 35, Dimapur nung 22, aser Wokha o Zunheboto nung anana (2) lir. Maneni, COVID-19 puteta lir nisung 8 taneptsü angu. Parnokji Kohima nung 5 aser Peren nung 3 lir" ta Health & Family Welfare Minister, S Pangnyu Phom-i ashi.

"Nagaland nung taneptsü anguba jenjang ajema kümogo. Hombarnü 93.34% aliba nungi tanü 91.91% aluogo" ta Dr Denis Hangsing-i metetdaksü.

Nagaland nung nisung 11,479

dak COVID-19 putetba nungi 10,666 taneptsü nguogo aser 628 anepaludar, ta paisa ashi.

Kohima nung COVID-19 puteta alir ka tanü asü aser iba nisung züngsema tasr ajak agi 70 kümogo. Tasürtem rongnung parnok 60 coronavirus ajanga asü, 7 tanga timtem ajanga aser 3 asüba kuli bushitepdar, ta Dr Hangsing-isa ashi.

Nagaland nung COVID-19 puteter nisung 115 tashi tanga state temi ogo, ta paisa shisem.

District balala nung COVID-19 putetba: Dimapur (6,273), Kohima (3,498), Mon 600, Peren (480), Tuensang (237), Zunheboto (142), Mokokchung (123), Phek (44), Wokha (35), Kiphire (29)

aser Longleng (18).

Nisung 11,479 nungi armed forces personnel 4,608, Traced Contacts 4,522, tanga state tem nungi arur 1,796 aser Frontline Workers 553 lir, ta Dr Hangsing-isa metetdaksü.

District balala nung tang anepalurtem: Kohima (357), Dimapur (175), Tuensang (41), Mon (24), Peren (17), Wokha (6), Kiphire (4), Mokokchung (2) aser Zunheboto (2).

COVID-19 puteta alirtem rongnung nisung 47 dak shirangba yimya terara lir, 5 ICU nung anepaludar aser 576 dakbo shirangba yimya kecha mali, ta Dr Hangsing-isa metetdaksü.

Taneptsü angurtem: Dimapur (5,983), Kohima (3,102), Mon (565), Peren (463), Tuensang (195), Zunheboto (137), Mokokchung (116), Phek (44), Wokha (28), Kiphire (24) aser Longleng (9).

"Nagaland nung COVID-19 alitsü akok ta temulung melemi bilemba sample 1,15,224 tendangogo. RT-PCR ajanga sample 70,286, TrueNat ajanga sample 36,194 aser Rapid Antigen Test ajanga sample 8,744 tendang," ta Dr Hangsing-isa metetdaksü.

State sorkari Foothill Road sendokba atema mepelar: DALT

Dimapur, December 8 (TYO): Nagaland state sorkari tesem ka atema dang sen crore 4127 alang National Highway Project 14 inyaksü lemozütsüba atema aoksar, ta Dimapur Ao Lanur Telongjem (DALT)-i metetdaksüogo.

State nung gari lenmang tejentiba aser tongtipangtiba yutsür tanga lenmangtem nun gang temulung agütsüba atema mepelar. "Foothill Road" ya Assam majangi Nagaland state kübok district balala ajanger. Assam nung mokdangdang Naga kin 11 shi mapang shia timtem ajurur, ta Media Cell, DALT-i sangdong ka nung ashi.

"Foothill Road" ya survey asüba sülen 1974 nungi yanglutsü tenzük saka tia maka küm 46 sülen-a iba lenmang ano meyangluzük lir. Tesüiba mapang lennirtemi alizüng tulu yur iba mapatong tenzük saka Nagaland state ngur küm 57 tashi süiaka, Nagaland nung district aika tangar kübok alitsüsa tia ajuruba ya

tejashitsüka lir, ta parnokisa metetdaksü.

Foothill Road Coordination Committee-i mapa tajung inyaka arudar aser külen Neiphi-u Rio-i aniba NPF-II sorkar mapang iba lenmang atema sen crore 70 agütsüba atema pelar. Maneni, kanga dang taoksatsü aketbaji, tawa mega projects sangdongba mapang iba dakji alaka iba mapatong asoshi senotsü magütsüba ajanga anendaka lir, ta DALT-isa ashi.

"Foothill Road meyangluba ajanga timtem ajuruba district tem nungi MLA 48 lir saka kanga dang taoksatsükaji, tawa mega projects sangdongba mapang Foothill Road medensemba atema parnoki ola madok" ta DALT-i metetdaksü.

Doyang apu yangluba mapa tenzükshiba atema pelar aser mapang shitak nung ibaji yangluzütsü imlar. Iba lenmang yangluba ajanga Mon, Tuensang, Longleng, Mokokchung, Zunheboto aser Wokha district tem nungi Assam

ajanga senzürtemi anisüngzük angutsü, ta parnokisa ashi.

Assam bandh ajanga timtem ajuruba sensotemi ola madokba ya tashimaitba ama mebilemstüla, kechiyong iba ya aremzüka ataba lir. State sorkari tekaratiba nung iba mapa tembanga inyaksü teimla nung aremzüker. Külen, Ao Baptist Arogo Mungdang (ABAM)-i iba lenmang yangluba nung yariteptsü atema 2019 küm sen 36,56,282 tenla agütsüogo. Anungji state sorkari ola madoki malitsüla, kechiyong arogotemi August 14, 2013 nungi iba lenmang tekaratiba nung yangluzütsü atema lumia sarasadema arur, ta DALT-isa ashi.

Nagaland sorkari super highway atema mega project tanga ka atema meinyakdang, Foothill Road nung gari senzütetsüsa yanglutsüla. Talisa tawa Tsutapela gate nung rongsenkettsüng tsütsü mokdangba ajanga nübortem timtemer, ta DALT-isa metetdaksüogo.

CORONAVIRUS WARA ASENOK LONGJEMER AKOKTSÜ ASOSHI -

Anepdang sakli tzü tera tatsük nung metsü tera enoker terok koloklok ta shidokang aser tzü tatsük apushia apushia jemang.

- In collaboration with the Media Cell, RD Department, Nagaland



Dimapur nung organic AC market ka lapokogo



Dimapur, Luchii/December 08 (TYO): State nung aluyimer ajungmesoa, Agri Expo site, 4th Mile Dimapur nung aliba Nagaland State Agricultural Marketing Board complex nung Minister, Agriculture & Cooperation, G Kaito Aye-i December 08, 2020 nü organic AC Market ka semzükja liasü.

Iba market ya state nungbo mezüngbuba alitsü, kong cold storage, collection, grading aser packing facility tem lir. Solar aser generator ajanga iba AC Market aser cold storage nung power tsütsü tebilemsü makai

atsüktsü.

Iba market semzükba sentong nung jembiba mapang, organic market ya aluyimer aser department ajangzüktsü atema lir, ta Minister Kaito-i ashi.

Nüburi nüngdakba peritsü aser dangar dak memetaloki pei poksünga peria alitsü atema aonsotsü züsentetba tali kumdaktsüsüla, ta pai ashi.

Iba market ajanga mozü mamshiba chiyongtsütem temaba jenjangi ajungkettsüsüla aser alu nungi züsentetba ajunga Nagaland

State Agricultural Marketing Board den sendakteptsüla, ajiasünung dang market ya külemi otetsü, ta Minister-i ashi.

Maneni pai Agri aser iba den sendaktepa aliba department tem dang khuret bona aluyimer ajungkettsü atema külemi inyaktüsü ayongzükja liasü.

Iba organic AC Market ya mesemzüksü dang Minister-isa kasa tesem nung farmers hostel atema nüngshilong azüngja liasü.

Iba sentong nung Agricultural Production Commissioner, Y Kikheto Sema-ia jembia liasü.

Benjong mapang nüburtem kumdanga alitsü ayongzükjer

Kohima, Luchii/December 08 (TYO): State nung COVID-19 anema raraba nung aruyaa aliba benjong, Christmas aser New Year ya kanga tekümdangtsü lir, ta Nagaland Health & Family Welfare Department ajanga metetdaksü.

Hombarnü COVID-19 Academy Nagaland ajanga 'Basic sciences and stigma of Covid-19' onük nung ajemdaker virtual session ka ayongzükba nung jembiba mapang Health & Family Welfare Department nung Public Health Specialist, Dr. Longri Kichu-i ashiba agi, benjong mapang nüburtemi pei yimtsüngi oa medemer aser kinunger semdanga senzüner, saka COVID-19 tashidak wara mechi tain Christmas ya balaka asütsüla.

COVID-19 Academy Nagaland ya Sphere India aser NSDMA, Home Department lungjemer WHO, UNICEF,

WFP aser HCL Foundation teyari ajanga tenzükba lir.

Linük yimtiba nung Durga Puja aser Diwali benjong mechi COVID-19 cases tali akumba tatishitsü amshia jembiba mapang, SARS-COV-2 (coronavirus) tashidak prokshia aoma azüoktsü mechi Nagaland nung aliba nüburtemi Christmas benjong tulu mayongzüksüla aser lokti tulu adenshiba nungi pila alitsüla aser yimtak leni maotsüla, ta Dr. Longri Kichu-i ashi.

Asüpila sentong aser kiyir benjong nung nüburtem adenshidang SOP tem mamshir, anungji nüburtemi Christmas mapang lokti adenshiba nungi pila melira state nung COVID-19 tensa tamajungba akumtsü, ta pai ashi.

"Asükwa mapang nisungtemi kanga anasatapa adenshitsü mesüra window, ventilator shibanger kilung nung kazür, aser ibaji ajanga

tashidak menatapa aotsü temelaba akumer. Shibanger aliba tesemtem ya coronavirus tashidak prokshitsü atema tesem tajung lir. Iba amala tensa nung virus ya talangba alir," ta pai ashi.

Christmas mapang nisung ajaki yimtsüngtemi aotsü jangrar, saka taküm Christmas nungbo nüburtemi tongtipang nüngdak melira mesenzüsüla, ta Dr. Longri Kichu-i ashi.

Iba atema department ajanga tekeratiba nung Festive Season Advisory agütsüsü, ta pai ashi.

Nüburtemi Christmas ka dang junga mamongtsü aser taruba küm tensa tajungba kumer benjong tuluba mungtettsü, ta pai ashi.

Paisa nüburtem dang 3Ws (wear mask, wash hands aser watch distance) nung anidaktsü aser 3Cs (crowded places, close-contact settings aser confined mesüra enclosed spaces) nungi pila alitsü nenshia ashi.



Rural Development kubok Financial Year 2020-2021 atema Mid term Review meeting ka amenba mapang Minister, Rural Development, Metsubo Jamir den RD director aser ketdangsürtem tangokba noksa ka yangi angur. Iba senden nung Mandays Generation, Geo-tagging, PMAY-G, MGNREGA, GIA, GPDP aser SAGY amala onük nung ajemdaker jembia liasü.

Nagaland Governor-i Terhünyi benjong salem lemsatsep Dimapur, Luchii/December 08 (TYO): Angami nunger adianu aser adianutsürtem aser Nagaland nung aliba nüburtem dangi Terhünyi benjong salem abener, ta Nagaland Governor, RN Ravi ajanga sangdong ka nung ashi.

Temoatsü nung alu aruba aser nüburtem nem takum tajung moatsüba atema Tsüngrem nem tenüngsang agüja iba benjong ya

amunger. Iba mapang lanu putui Angami nunger sobaliba tajung angazüktsü maongka angur. Terhünyi benjong nung asenoki dangar dang aria bilemba, telungjem aser tatok agütsüba yimya tajungtem angur.

Iba benjong amungba mapang ajaki COVID-19 protocol tem amshia amungtsü ayongzükjer, ta Governor sangdong ajanga ashi.

Water Resources Department staff tem training agi



Dimapur, Luchii/December 08 (TYO): Water Resources Department (WRD) ajanga WRD, Kohima nung Chief Engineer indang office nung aliba conference hall nung December 08, 2020 nü Department indang LDA tem atema 'Office Procedure' nung training ka ayongzükja agia liasü.

Iba training nung Under Secretary, Law & Justice Department, Andreas Ezung ya shisalen sayur liasü.

Chief Engineer, WRD, Er. Hotovi Ayemi-i sentong tenzükja jembiba mapang, LDA tem ya Department indang tongtipang nokdang ka amai lir aser staff nem office inyakyim indang nüngdakba shisatsü agütsüsü atema training ya agir, ta ashi.

Er. Hotovi-i training nung adener dang parnok mapa

angazüktsü, nendaka inyaktüsü aser tejenpur dang nungi teyari meshitsü nungnanga malitsü ajungshia liasü.

Executive Engineer, Er. Wapangnaro Imchen-i training agirtem dang training nungi angazüktsü ajungshi aser office inyakyim, file amshiyim aser drafting ya anogoshi inyakba mapa nung kanga nüngdakba lir, ta ashi.

Water Resources Department nungi iba office inyakyim (file ketdangsuba, noting & drafting, forms of communication), establishment aser administration matters (service matters, confirmation of service, seniority, resignation) aser personal matters (maintenance of APAR) indang training agütsüba nung nisung 18 training agia liasü.

Dimapur nung tashiyim amshia senotsü sarur ka apu

Dimapur, Luchii/December 08 (TYO): M.P Road area, Dimapur nung aliba shishilembar dang nungi December 07, 2020 nü ozüng alema saru meshia aliba mapang Dimapur police ajanga arishi küm 38 tain Aghato

Sumi apu. Pa ket nungi sen 6,010 ngutet aser iba dang sendakba nung ken o ka East Police Station, Dimapur nung zülüokogo, ta sangdong ka ajanga ashi.

Nagaland Police ajanga taoba ita inyakba osang kar metetdaksü

Dimapur, Luchii/December 08 (TYO): State nung ozüng alema inyaksangshiba samadaktsüsü, nokdangtsü aser mapa tamajung inyakba putettsü atema mera balala agia aruba mapang Nagaland Police ajanga November 03, 2020 nungi November 17, 2020 tashinung nisung kar pua ayuar aliba garitem ngutet, miim mozü, Indian Made Foreign Liquor (IMFL), bendang linük nung yangluba moko aser nokdanga aliba moko agi yangluba osettem pua liasü.

Iba mapang police temi Registration number NL07H

3356 aliba i-20 gari ka aser Registration number NL02E4287 aliba bike ka ayuar aliba pua liasü.

Parnokisa IMFL liter 593, ganja sertet 10, brown sugar gram 69, Spasmo-Proxyvon Tablets aser danga mozü tejang 739, bendanglima nung yangluba moko packet 15,000 aser nokdanga aliba moko agi yangluba oset packet 400 pua liasü.

Iba dak sendakba nung Nagaland police ajanga nisung 24 pua ozüng nung aliba ama tapet temerenshi agütsüogo, ta sangdong ka ajanga ashi.

Assam & Tripura nung 'Bharat Bandh' takok ngua agiogo



Guwahati / Agartala, December 8 (Agencies): Mongulbarnü linük nung aluyimertemi "Bandh Bandh" ayonga agiba ajanga Assam kübok tesem aika nung tetsükdaktsü ajuruogo.

Tanü aluyimertemi ghonda 4 lungkak aitdang Assam nung aluyimer teloktem den tanga loktitemia yaritep.

Prime Minister Narendra Modi-i aniba sorkari ashishitep aketba farm laws agientsüla ta parnoki takhangba agüja lungkak ait.

Upper Assam kübok Jorhat district nung Centre of Indian Trade Unions (CITU)-i anir kanga sashia lungkak aitogo.

Assam nung Krishak Mukti Sangram Samiti (KMSS) kübok tentetba telok Rajjor Dal-ia Jorhat nung lungkak aitba nung shilem agi.

"Onoki Bills aitsür aser aluyimertem den külemi noktaker. Modi-i aniba sorkari nübortem anema ozüing yangluogo" ta Rajjor Dal activist kati ashi.

Tanü Tinsukia jila nunga iba sentong takok ngua agiogo aser shishilembadak melapokba den nisungtemi kidang dang among.

Tripura nunga tanü Bharat Bandh ayonga amongdang shishilemdak aser dokantem ajak shibang.

Tripura nung BJP sorkari bandh anema noktaker saka CPIM aser Congress dena opposition party temibo bandh pusema nungit.

BJP pusemertemi state kübok tesem balala nung bike rally tem ayonga agi aser idanggi public dang mokdang nung shilem magitsü ayongzük.

Külen, CPIM aser Congress züingsemtemia aluyimertem pusema yimdong nung mokdang ayonga senzü.

"Linük nung aluyimertem mechi nung onoki nübortem dang Bharat Bandh pusema nungittsü ayongzük" ta All Indian Krishak Sabha (AIKS) lenir Pabitra Kar-i ashi.

Tripura Congress-ia aluyimertem pusema sentong ka agi. Agartala nung aliba Congress Bhawan kima nung parnoki tires rongdoka lungkak ait. Idanggi parnoki "Modi hatao, desh bachao" yimyim ayim.

Congress züingsemtemi lungkak aitba tesemi BJP züingsem kar ao aser idanggi mepetmesü ka adok saka police-i tensaji azüoka liasü.

Jorhat Inspector of Schools indang signature ayazükba atema FIR benok

Jorhat, December 8 (Agencies): Jorhat Inspector of Schools, Dr Subhalakshmi Rajkumari-i junior office assistant ka anema ken o benokogo.

Jorhat district nung junior office assistant ji Utpal Mudoi ta jangjaogo aser pai Dr Rajkumari indang signature ayazükba amshi. Mudoi ya Gitarthi High School nung inyaker.

Mudoi-i kulikaket kar nung Dr Rajkumari indang signature ayazükba Guwahati nung aliba

director of pensions dangi aben.

District nung school balala nungi retired employees 12 indang pension kaketter nung Mudoi-i Dr Rajkumari indang signature tiyazü amshi.

Tawa tu Director of pensions, Guwahati-i la indang office dangi shidi ka züluba ajanga iba ya putet.

School balala nung retired employees 12 indang kulikakettem nung metokmeperi kar lir ta director of pensions-i shidi nung shia

liasü.

Dr Rajkumari-i iba atema bushitepdang retired employees 12 indang kulikakettem nung la indang signatures ayazükba amshiba putet.

Inspector of Schools-i iba atema bushisüingdanga aodang Mudoi-i signatures amshiba putet aser paia nangzük.

Mudoi-i ozüing alema mapa inyakogo anunggi police-i bushisüingdang tapet mapa inyaksüla, ta Dr Rajkumari-i ashi.

IMA-i Ayurvedic doctor anema lungkak ait

Dibrugarh, December 8 (Agencies): Mongulbarnü Indian Medical Association (IMA) Dibrugarh branch-i Assam Medical College and Hospital campus nung ghonda ana lungkak aitogo.

Central Council of Indian Medicine (CCIM)-i Ayurvedic doctors nem surgery agidaktsütsü lemtetba anema parnoki lungkak ait.

Indian Medical Association (IMA)-i allopathic doctors ajak dang December 11 anepdang 6 ako nungi nikongdang 6 ako tashi linük nung non-essential aser non-Covid-19 services anentsü mepishia metetdaksüogo.

November 19, nü CCIM-i

PG Ayurveda Education Regulations, 2016 nung temelenshi ka asüba ajanga post-graduate (PG) Ayurvedic students-i surgical procedures angazüktsü temelaba agütsü.

Iba nung general surgery, orthopedic, ophthalmology, ENT, and dental procedures aser surgeries dena lir.

"Sorkari iba mapa inyakba anema onoki lungkak aittsü metetdaksüogo aser tanü agiba sentong ya iba nung shilem ka lir" ta IMA Dibrugarh branch president, Shantanu Lahkar-i ashi.

Ayurvedic students nem MS (Ayurveda) shalya tantra general surgery aser MS (Ayurveda) shalakyta tantra

(disease of eye, ear, nose, throat, head and orodentistry) agütsütsü ta sorkari telemtetba agi.

"Sorkari tawa medicine ajak ka küma lokteptsü lemtetba ajanga nisung million aika lendongi idaktsütsü aser iba atema IMA-i tebilemsü khuret abener" ta Lahkar-i ashi.

Ayurvedic PG doctors nem surgery agidaktsüba ya public health atema lendong lir. Onoki iba telemtetba meyipa agitsü akhanger, ta paisa ashi.

Mongulbarnü lower Assam branch Indian Dental Association-ia Nalbari, Barpeta aser Bongaigaon district tem nung CCIM telemtetba anema lungkak aitogo.

AASU-i Dec 12 nü 'CAA' anema lungkak aittsü

Guwahati, December 8 (Agencies): Assam nung Citizenship (Amendment) Act anema lungkak aitba sülen küm ka ajungba bilemteta All Assam Students' Union (AASU)-i December 12 nü lungkak aitba sentong tulu ka agitsü osang metetdaksüogo.

Yaküm CAA anema lungkak aiba nung AASU-i tongtipang shilem agia liasü. Assam nung CAA anema lungkak aitdang nisung 5-i taküm bendanga agütsüba atema temeten meshia

lungkak aittsü, ta AASU-i metetdaksü. "December 12 nü 'CAA' anema lungkak aittsü tenzükba sülen küm 1 ajungtsü. Assam kübok tesem balala nung AASU-i taküm bendanga agütsür nisung 5 bilemteta tetushi agütsütsü telemtetba agiogo" ta AASU General Secretary Sankar Jyoti Baruah-i ashi.

December 12 nü agitsüba sentonggi "Gana Hoonkar" (public's warning) ta ajatsü aser district shia sentong balala ayonga agitsü.

Form No. 3 [See Regulation-15 (1)(a)]
DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)
Case No.: OA / 78 / 2020 Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993. Exh. No. 640
BANK OF BARODA (Erstwhile VIJAYA BANK) - VS - HOKALI YEPHTO To, 1. HOKALI YEPHTO D/W/S/O- Daughter of Hukato Yeptho, House No. 539, Block No. 5, Chekiye Village, Dimapur, NAGALAND- 797112.
SUMMONS
WHEREAS, OA/78/2020 was listed before Hon'ble Presiding Officer on 16.11.2020 .
WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of Rs. 20,99,106.70/- (application along with copies of documents etc. annexed).
In accordance with sub-section (4) of section 19 of the Act, you, the defendants are directed as under :-
(i) to show cause within thirty days of the service of summons as to why relief prayed for should not be granted;
(ii) to disclose particulars of properties or assets other than properties and assets specified by the applicant under serial number 3A of the original application;
(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;
(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.
You are also directed to file the written statement with a copy thereof furnished to the applicant and to appear before Registrar on 05.01.2021 at 10:30 A.M. failing which the application shall be heard and decided in your absence.
Given under my hand and the seal of this Tribunal on this date: 21.11.2020. Signature of the Officer Authorised to issue summons.

Form No. 3 [See Regulation-15 (1)(a)]
DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)
Case No.: OA / 77 / 2020 Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993. Exh. No. 641
BANK OF BARODA (Erstwhile VIJAYA BANK) - VS - LANDONLIU PAMEI To, 1. LANDONLIU PAMEI D/W/S/O- Daughter of Late G. Pamei, House No. 45, K Sachu Colony, Dimapur Dist. Nagaland State, Dimapur, NAGALAND- 797112. 2. MRS. ALUGANG PAMEI Wife of Aghlesh Prasad, House No. 51, K Sachu Colony, Dimapur Dist. Nagaland State, Dimapur, NAGALAND- 797112. 3. MR. AGLESH PRASAD Son of Late Kanhaiya Prasad, House No. 51, K Sachu Colony, Dimapur Dist. Nagaland State, Dimapur, NAGALAND- 797112.
SUMMONS
WHEREAS, OA/77/2020 was listed before Hon'ble Presiding Officer on 16.11.2020 .
WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of Rs. 74,59,060.00/- (application along with copies of documents etc. annexed).
In accordance with sub-section (4) of section 19 of the Act, you, the defendants are directed as under :-
(i) to show cause within thirty days of the service of summons as to why relief prayed for should not be granted;
(ii) to disclose particulars of properties or assets other than properties and assets specified by the applicant under serial number 3A of the original application;
(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;
(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.
You are also directed to file the written statement with a copy thereof furnished to the applicant and to appear before Registrar on 05.01.2021 at 10:30 A.M. failing which the application shall be heard and decided in your absence.
Given under my hand and the seal of this Tribunal on this date: 21.11.2020. Signature of the Officer Authorised to issue summons.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO. DTE/MIN/iv/2013/8

Dated: Kohima, the 8th December, 2020

NOTIFICATION

This is to inform all the Institutes Nodal Officer(s) (INO) who have enrolled under National Scholarship Portal (NSP) for Post-Matric Scholarship/ Merit-cum-Means based scholarship under Ministry of Minority Affairs, that the Ministry has issued certain guidelines to be followed by the INOs in verifying the Student's online application at NSP. The INO's of all the Institutes are directed to visit the guidelines which has been uploaded at the Directorate's website www.dtenagaland.org.in.

**(ER. VIPULHOU LHOUNGU)
JOINT DIRECTOR**

Issued by DIPR



TIR YIMYIM YIMOBILEM (EDITORIAL)

DIMAPUR RASEMNÜ, LUCHII (DECEMBER) 09, 2020

Decoration nung sen meindokli

Khristan-tem asoshi dang masü saka alima nung talir ajunga asoshi benjong tulutiba Christmas mapang tonga arur. Atangji, ibai Tsüngrem temeim bilemtetba mapang lir, anungji tepelatsü anogo. Ibayongji, nisungtemi nisungtem peladaksütsü asoshi kecha mekurui süoshi aser chiyongtsü nung dang masü saka pei kidang aser tongtibang tesemten nung alima topur jungdaksütsü asoshi decoration nung sen aika endoker. Ibaji Christmas topur junga mongnüba agi lir, anungji takokertemibo yamaji kiojen aser yimti yimdong topur jungdakja benjong sübotsü enokbaji kanga junger. Iba jagi Christmas akümkettsür aser alima temenungratsüka topur jungdaksür. Ajisüaka, tang ama alima wara agi tounüleni moutet aser teinyaknüsü meinyaktet aliba mapang ya bilemdangra, nisung aika mapa maka kümer benjong süoshi alitsü aser decoration enoktsübajibo yutsür, kidang chiyongtsüa maka shisabolua aliba kibong aika lir. Asenoki tema nungi reprangdangbo, asen lima nung chiyongtsüa maka sensakertem ya Dimapur yimdong nung meshimetsürtemji dang amai bilemer, ajisüaka item meshimetsürtem dang nungi tesensakba aser timtatemba asen nisung aika lir. Atangji, timtemyonga asen nisungibo yimdong nung meshimetsüa mesenzür, iba jagi nisung ajak pei nungdakbo peria ngua alir amai asenoki bilemer. Ajisüaka, tang ama benjong mapang nung balaka, kidang makamaitba agi kibong aika nung mepelatep adoker aser Christmas benjong pelatepa memongtetter. Iba tiaji bilema, takokeribo taküm küm ama yabo, pei kidang sen aika endoka Christmas decoration enoktsü melena, kanga enoknüra tongmelang ka dang enoker, decoration nung endoktsüba sen jagi makamaiter kibong kar repranga yarira, iba jagi shitakba Christmas temeim mapa agi sayur asütsü. Christmas mapang nung asenoki Santa Claus yanglur ayuba aser Santa Clus jilu aiba ajakji, asenoki junga bilemdangra, asenok dang Christmas mapang tanur tain ajak den temeim lemsatepa yariteptsü sayur. Benjong decoration enokba jenjang ya kanga tasak, anungji kibong aser arogo aikati decoration nung sen lakh junga endoker. Ajisüaka, asen kidang Christmas decoration sentsüpranga enoka yur aser meketa alir tangartembo küm nung tulaa kata malitet aser benjong nung shi seret ka alitsüa makoker ta lira, asen kidang enokba decoration jagi shinga nema tepela magütsür ta asenoki bilemdi. Kasaji, decoration agi tenla ki sentsüpranga mesangbangaka, arogo nunger kibongtem nung sensakba agi tepela melira, tenla kidang decoration jagi shinga nema Christmas tesangwa magütsür ta asenoki bilemtsüla. Tang asenok Covid-19 tashidak nungi jenbua alitsü asoshi kümdanga inyaksangshiba ajak ya sobaliba tasen (new normal) lir, joko yamai talangka aotsü, anungji asen libaliro nung sobaliba tasen ka tenzükdang, asenoki Christmas amongba yimya yaa temeim mapa inyakba sobaliba tasen ka nung tenzükra, iba jagi Tsüngrem pelatsüsa nisung aika yaritettsü. Yaküm tashibo asenoki asen kidang decoration enokba aser asen kinungertem asoshi süoshi aser chiyongtsü aliba nung tangar kibong karbo küm ka piyong nungdak perir anungtsüsa endokogo. Joko, yamaji meindokli aser asenoki shir nemsä teyari agütsütettsü ta bilemdangdi. Ashiko, kibong kar asoshibo sen meyirijang kajia aika asütsü akok, jang bag ka den shijep tilaka agütsüba jagia kibong karbo peladaksütettsü mesüra par nungdakba oset ka agütsütsüa akok. Aji oda, Christmas decoration nung sen meyirijang ter endoktsü agibo, iba jagi kibong anasemka Christmas tenung nung yari tajungba. Atangji, takaribo decoration-a kanga junga enoktetsü aser temeim agi teyaria kibong aika yaritettsü. Iba tangatetba nung, talisa taküm kumbo, asen kidang decoration enokdang tangar kibong tia indanga bilemdangdi aser Christmas tenung nung asenok süoshi aliba mapanga tangar taküm tia indang reprangdangdi aser asen kidang shi ango den chiyongdanga kidang kiyonger aser yimer yimsangertem tia bilemdanga chiyongdi. Atangji, Christmas ya decoration, süoshi aser chiyongtsü masü saka Tsüngrem temeim lir. Iba temeimji asenoki decoration, süoshi aser chiyongtsü ajanga mapa küma sayutsü merangdi.

OLEMSABANG

KULISÜBA - OTONGDAR

~ Ms. Ayangla Longchar (Christain Education Promoter)

(Yashi adok nungi...)

Süra tamanger ka asoshi kulisüba ya kechi aser kechi nükjidong ka nung asenoki kuli asür. Mathi 28:18-19 nung, "Yisui arua parnok den jembia ashi, "Kodak nung aser alima nung tashi ain ajak kü nem agütsüogo, anungji nenoki oang aser kin ajak nütsüng kümdakjang, Tebu, Techir aser Tanela Temeshi tenung nung parnok baptijang." Aser ano Tenyartem Mapa 1:8 nung, "Saka kodang Tanela Temeshi nenok dangi arudir nenoki ain agizüktsü, aser Yirusalem nung, Yihuda aser Samaria ajunga nung aser alima tatem tonga, nenok kü kulitem asütsü." Shia aliba ya asen tamanger ka asoshi kulisüba tamendakdak Lai tekongtem lir. A.B. Bruce-i, 'The Training of the twelve', kaket nung iba tetezü ya kanga junga rasaa shia lir. Pai ashiba agi, Yisu nütsüngtemi Pa-ji parnok lenir tajung ka ta angateta liasü, tangar lenir dang nungi kenyongi balaka ta nütsüngtemia repranga aru, kechiyong Yisui jembizüka ayuba ama, Pai mapa küma inyaka aruba lenir ta nütsüngtemi pa dak angu. Tebu Tsüngrem sentong atalokdakja inyakba lenir ka ta Yisu dak reprangtet saka, parnoki Yisuji shitakba Tsüngrem chir lir ta asüba kuliji junga mamangtet, parnok timba kati bilem Yisu ya ainakar mesüra tesayur tajung ka ama-ang bilem. Kodang Yisu tasü nungi takok ngur shia aru, parnoki idangji, Yisu Khrista indang shitakba ayakji jangja aküm. Khristaji chichiba Tsüngrem chir ta metet.

Yisu Kangki dong nung mangelokdang, pai tepila O jembiba aser Pa sür shia arur, Kotaki atutsü mapang jembiba tepila O balala liasü ta A.B. Bruce-i sa kaket nungjisa shia angutsü, kechiyong Yisu Kangki dong nung metatsü mapang nungbo, parnok dang mulungnen o aika jembia liasü. Pai nütsüngtem dang, kati ka den meimteptsü ajungshi, kotak nung parnok asoshi room renemtsütsü nangzük; alimai Pa mechi parnok sempatsü ta shia liasü aser parnok tejashi agi tepela akümtsü teyimla agütsü(Yohan kaket). Kodang Yisu shia aru, kotaki ayipa atutsü mapang, mulungnen o masü saka teinyaktsü o, ozüng ka ama parnok dang ashi. Pai joko asüküma, par nütsüngtemji tekübok tia nung alener amshiba temaitsü masü saka alima ajak dangi osang tajung koba parnok tenük agi asangsang nung angu aji sangoktsütsü asoshi liasü. Tsüngrem yimili asoshi inyaker tem ka süa alima nung alir ajak atema tekümtet aser atangji lenmang indang kuli asütsü parnok ne Yisui ozüng agütsü. iba ya parnok asoshi kanga tesüngmangtsü, tepang agi rasaa meshitetba mapang ka liasü, saka parnoki iba mapang ya pelateba aser ano tali bendanga agütsüshiba mapang ka ajuruba lir. Parnok taküm nung Khrista mulungjang asoshi kishi lapoktsüba mapang liasü. Parnoki Khrista shiba Kangki ding nung tangar asoshi tatok meshia sarasadem, iba küsa Khrista yagi asenok meimchir nem tatok agütsütsü tashi lir ta ani tali jangja metet. Anungji tatok agüja, tekümtet osang bener alima dangi aotsü Yisui, Par nütsüng nem nugloktsü. Saka Yisui par nütsüng nem nungloktsü. Saka Yisui par nütsüng temji meimchir dang asü nung mabensa aser tashi mait ta meteta liasü. Anungji temaba nung aluba tashiji parnok asoshi nungdaka lir ta metet aser aji, 'Tanela Temeshi'.

Süra tamanger ka asoshi kulisüba ya kechi aser kechi nükjidong ka nung asenoki kuli asür. Mathi 28:18-19 nung, "Yisu-i arua parnok den jembia ashi, "Kodak nung aser alima nung tashi ain ajak kü nem agütsüogo, anungji nenoki oang aser kin ajak nütsüng kümdakjang, Tebu, Techir aser Tanela Temeshi tenung nung parnok baptijang." Aser ano Tenyartem Mapa 1:8 nung, "Saka kodang Tanela Temeshi nenok dangi arudir nenoki ain agizüktsü, aser Yirusalem nung, Yihuda aser Samaria ajunga nung aser alima tatem tonga, nenok kü kulitem asütsü." Shia aliba ya asen tamanger ka asoshi kulisüba tamendakdak Lai tekongtem lir. A.B. Bruce-i, 'The Training of the twelve', kaket nung iba tetezü ya kanga junga rasaa shia lir. Pai ashiba agi, Yisu nütsüngtemi Pa-ji parnok lenir tajung ka ta angateta liasü, tangar lenir dang nungi khenyongi balaka ta nütsüngtemia repranga aru, kechiyong Yisui jembizüka ayuba ama, Pai mapa küma inyaka aruba lenir ta nütsüngtemi pa dak angu. Tebu Tsüngrem sentong atalokdakja inyakba lenir ka ta Yisu dak reprangtet saka, parnoki Yisuji shitakba Tsüngrem chir lir ta asüba kuliji junga mamangtet, parnok timba kati bilem Yisu ya ainakar mesüra tesayur tajung ka ama-ang bilem. Kodang Yisu tasü nungi takok ngur shia aru, parnoki idangji, Yisu Khrista indang shitakba ayakji jangja aküm. Khristaji chichiba Tsüngrem chir ta metet.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Delhi-NCRchoirs-iKhristmasnunge-concertsaseronlinecarolsagitsü



Delhi-NCR nung choir tejentiba, 'The Capital City Minstrels' telokpur noksa nung angur.

Luchii/December 08, 2020:

Coronavirus wara aliba agi takumbo India nung Khristmas mongpu mapang nung osangtajung kentenertem aser choir telok balalai e-concerts dang agütsütsü aser online ajangadang carol sentong agitsü.

Youth For Christ telok nung züngsemtemia telok tilala lemsar video call ajangadang Khristmas carol renemshidar.

Coronavirus wara aliba agi Delhi-NCR nung chior telok balalai tetsükdaktsü ajurur, talisa parnok züngsem ajak adenshia Khristmas carol atema ken merenemshiteter. Ibayongji osangtajung kentenertem aser chior telok balalai takumbo online ajangadang kentenba sentong aser carols sentong lemsateptsü lemtetogo.

Online ajanga kentenba sentong 'live' lemsateptsü lemtetba dak sendakba nung Youth For Christ choir nung züngsem, Mukul Singh-i, "Onok telok tilala kuma lemsar ajuruteper aser video calls ajanga ken renemshir. Kentenertem nem emails ajanga staff notations agütsür. Taküm Khristmas nung onoki ken tejen aser tasen aika atentsü aser jilushi-a sayatsü. Onoki Hindi aser English oshi naprongla nung ken kar renemogo aser kobi melii onok meyong social media handles ajanga lemsateptsü," ta metetdaktsü.

Delhi-NCR nungsa Capital City Minstrels choir-ia online ajanga dang kentenba sentong agitsü metetdaktsüogo. Küm 26 tekjaklen tentetba telok The Capital City Minstrels (CCM)-

i küm aika ken balala ajanga lokti ajungmesoa arudar.

CCM telok nungi züngsem, Reem Khokhar-i, tamalenbo onoki Bodhbar anogo shia adenshir ken renema liasü, saka tangbo onoki online ajanga ken renemer, ta metetdaktsü.

Reem-isa, "Onoki küm aika yamaji inyaka aruogo. Choir nung tanur-tain aser teintet rogo aika meyoktepa lir, anungji linük yimtiba (Delhi) nung onok tashidak nungi kümzüka alitsü atema takumbo March ita nungi onok majuruteper," ta metetdaktsü.

Ajisüaka choir züngsemtemi Khristmas atema Amy Camp leniba kübok ken aika renemshidar, aser item ken rongnung 'Christmas is coming', 'Need a little Christmas' aser 'Silent Night' densema lir, ta laisa metetdaktsü.

ANO GO ABEN TSÜNGREM DEN

Teinyaktsü

Isaia 6:8; Mathi 4:19-20; 5:13-16

February 14, 156 nung Communist Party Central Committee nung Nikita Khrusehevi ashi, "Communist kaji terepranger dang asütsü kecha temeden mali!" Communist atema aji shidak süra, ibai Khrista asoshi tali ochi lir.

Laishiba yimsü kija shiai inyaktsüba mapa lir. Tamajung tashi kübok aliba lima nung langka tajung inyaktsübaji Khristan mapa teinyaktsü lir. Lokti kümzüksü mapa inyaktsübaji government ozüng dang nungi tashi ain aliba Khristan kaji tongtipangba lir.

Tanü tebilemetsü osangtajung ozüng amshitsübaji Khristan ka asoshi mapang tajungji lir. Aji inyaktsübaji Khristan kati bilemetsüba mapa lir.

Khristan putu tenzükdang, Yisui sermon ka nung ashi, "Nenok alima tesangwa!" Idangnungjagi Khristan kaji terepranger dang asütsü temetenmali ta asenoki angazüker. Khristan den tesendaktepji kü taküm nung mezüngbuba mapa asü? Mesüra club member amadang alir? Kü Khristan yimsü tashi tait taretep maka kar alitsüla asü?

Ethiopia nungi Yihuda nunger 300 dak tema Israel-i meyipa aruogo

December 08, 2020: Israel nung kibongtem tanaben longjemtsü atema 2015 küm Israel Ato kilonser, Benjamin Netanyahu-i nangzüka sülen Ethiopia nungia Yihuda nunger nisung 300 dak tema Israel tonga aruogo.

Brihostibar (December 4) anepdang Yihuda nunger 300 dak tema Israel nung aliba Ben-Gurion International Airport tonga aruba mapang nung parnok aikati ali nung tebang mesepa liasü.

Airport nung Minister tem densema ketdangser aikati parnok agizük.

Netanyahu-i, "Kü kinüngtsü

künata tenük nung nüktzü tsüngranger nokdaka liasü. Iba ya Yihuda nunger otsü aser Zionist otsü nung kanga nungdak aser tongtibang," ta metetdaktsü.

Ano maneni Ethiopia nungi Yihuda nunger nisung 100 dak tema arutsü; Israel ketdangsertemibo parnokji Yihuda nunger ama mezüngshir, ajisüaka parnok Yihuda nunger nungi jakzükbatem lir, ta osang ka ajanga metetdaktsü.

2015 küm Netanyahu-i Ethiopia nungi Yihuda nunger Israel-i anir arutsü nangzüka liasü; tan hopta parnok 300 dak

tema Israel tonga aruoka ano Yihuda nunger 7,000 shi Ethiopia nung lir.

Jewish Agency-i ashiba agi, iba ya "Operation Zur Israel" mezüngbuba shilem ka lir aser Ethiopia nungi Yihuda nunger 2,000 anir arutsü atema 2015 küm nangzüka inyakba lir.

Ethiopia nung asoba aser Aliyah & Integration Minister, Pnina Tamano-Shata-i, "Operation Solomon sülen Ethiopia Yihuda nunger meyirjang aika tokja liasü, ibayongji küm aika ongdang aliba sendakteptsü atema iba maparen inyakogo," ta metetdaktsü.

Punjab nung Khristantemi aluyimertemi longkak aitba pusemer



Punjab kübok Jalandhar yimti nung Khristantemi aluyimertem pusema longkak aitba noksa nung angur.

Jalandhar (Punjab), December 08, 2020 (Agencies): December 07, 2020 nü Catholic Yuva Dhara (CYD) nungi züngsemtemi Santa Claus sübotsü semer Jalandhar yimti (Punjab) nung alirtem dang aluyimertem pusema longkak aita Delhi-i aotsü ajungmesoa liasü.

Khristantemi aluyimertem pusema Jalandhar nung Desh Bhagat Yadgaar Hall nungi Company Bagh tashi longkak aita jajaba den külemi yimti nung alirtem dang December 8 nü aluyimertemi ayongzüka 'Bharat Bandh' nung shilem agitsü ajungshi.

CYD lenirtem- Gagan George, Amern Happy aser Dominic Mattu nungeri, aluyimertemi longkak aitba ya aluyimertem atema dang masü saka nübur ajak tenüng nung ajaki alu nungi züsentetba chiyungtsütem nung metaloker, ta ashi.

Khristan lenirtem jagisa, Khristantem-a aika aluyimertem

mesüra alu nung aayangertem lir, anungji Khristantemi Punjab nung aluyimertemi longkak aitba pusemer aser December 8 nü aluyimertemi ayongzüka Bharat Bandh-a pusemstü, ta metetdaktsü.

Longkak aitba mapang nung Khristantemi, 'Aluyimertem nem ochi temeden agütsütsüla' aser 'Aluyimba dak sendakba ozüng asemprong agienang' ta yimyim ayima liasü.

Tawa Parliament nung sorkari aluyimba dak sendakba ozüng asem agizükba ya aluyimertem aser nungburtem anema lir, ta shia aluyimertemi tesüiba anogo 10 dak tema longkak aitar.

India nung aluyimba dak sendakba ozüng tasen asemji-Farmers' Produce Trade & Commerce (Promotion and Facilitation) Act, 2020, 2-Farmers (Empowerment and Protection) Agreement on Price Assurance & Farm Services Act, 2020 aser Essential Commodities (Amendment) Act, 2020 lir.

Khristantemreshikangshiba linük rongnung Nigeria züngokogo

December 08, 2020: US-i Khristantem tamajungtiba reshikangshiba linüktem rongnung Nigeria züngokogo aser Sudan o Uzbekistan linük nabo züngdokogo.

West Africa nung aliba linük- Nigeria ya Africa nung nütsüng timba aliba linük lir, aser iba linük nung tongti yimsü anaji Khristan aser Islam lir. Nigeria nung Boko Haram telok densema Islamic kiralongrartemi timtem agüja Khristantem jenti tepsetdar.

US Department of State indang Countries of Particular

Concern (CPC) list nung Nigeria dak alia tanga linüktemji Burma, China, Eritrea, Iran, North Korea, Pakistan, Saudi Arabia, Tajikistan aser Turkmenistan linüktem lir. Item linük nung tamangba temeden anema kanga inyaker. Nigeria dak alaka tanüngba linük 9 yabo 2018 aser 2019 küm nunga CPC list nung densema liasü.

US Secretary of State, Mike Pompeo-i, "Tamalen tamangba yimsü dak sendakba nung reshikangshi ajanga jena aoertemi tentetba linük-

United States-i tanübo tamangba yimsü temeden atema inyaker, aser onok mapa ano metembang," ta metetdaktsü.

Yaküm US State Department indang Special Watch List (SWL) nung Nigeria züngoka liasü aser takumbo CPC nung züngoker.

2020 küm Special watch list (SWL) nung Comoros, Cuba, Nicaragua aser Russia linüktem züngokogo. Cuba aser Nicaragua na 2019 küm züngoka liasü aser 2018 küm Russia linük züngoka liasü.

OLONG PAITEP # 5664

1				2					3
						4		5	
6			7						
					8		9		10
11									
12		13						14	
			15						
							16		
	17								
					18				

TIPIEN

- 1. Yakob tetsü - (6)
- 4. Mezüng nisung - (4)
- 6. Tasen lai kakat ka - (5)
- 9. Au lanu - (2)
- 12. Tejen lai 21 buba - (11)
- 15. Tekolak tembar - (2)
- 16. Zütsüra anepsang - (5)
- 17. Kain tenu - (4)
- 18. Hana-er jabaso - (6)

LANGTSÜNGLEN

- 2. _ _ _ gki - (3)
- 3. Telungpur telok ka - (2)
- 5. Tsüngremi mezüng poktetdaksüba - (5)
- 7. Tia - (4)
- 8. Yakob-er jabaso ka - (5)
- 10. Abraham tebutü - (4)
- 11. Rebeka kinungpu - (4)
- 13. Esau tenu - (5)
- 14. Tzünglu tilala aru - (4)
- 16. Jafet tebu - (3)
- 17. Teka agi kongshi - (2)

OLONG PAITEP # 5663 TELANGZÜBA


TIPIEN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

Agüja aliba noksa nung meputepi aliba 5 bushiang



TANÜBO NAI LANGZÜANG

Q. Malayan squirrel ya _____ tesem nung angur.

- A. South China
- B. Thailand
- C. Vietnam
- D. All the above

(Taruba adok nung onoki langzüsü)

YASHI ADOK TELANGZÜBA : Second

NAI-A YA METETTER MA?

NOVEMBER ITA INDIA NUNG GARI TIMTIBA AYOKBATEM:



SUDOKU # 5705

TELANGZUBA # 5704

7	9		8	2	1		5	6	9	5	7	6	1	3	8	2	4
		4	9						2	4	8	7	5	9	3	1	6
		1	5			9	7		1	3	6	8	4	2	9	5	7
			7	9	5				3	6	2	4	8	1	5	7	9
4							7	9	7	9	5	3	2	6	4	8	1
	2			5		6	4	8	8	1	4	5	9	7	2	6	3
1						7	9		5	2	1	9	7	4	6	3	8
	7		4	9			3	2	6	8	9	1	3	5	7	4	2
5		9	2	1	7	8	6	4	4	7	3	2	6	8	1	9	5

OJANG LUTEP # 5253

- TSENSMELHIÜ :
- ÜBASO :
- NGTA :
- NGNUI :
- NZÜTEK :
- GDANUNNG :
- MBBILEA :
- UNGAJA :
- KTEINYATA :
- SÜAOT :

OJANG LUTEP TELANGZÜBA # 5252

ANEMA ALITSÜ ASOSHI CHIYONGTSÜ TAJUNG ACHIBA DEN TEMANG ANEPALUTSÜ NÜNGDAKER

TAN HOPTA ATEMA - KOMA SÜLA ?

Q. Nagaland nung Naga nung ali kimong ya Naga nung masüba bendangertem danga ayoktsü mela nunga koma sula ?



Mongolbarnü Jalandhar nung Center indang agri law agintsü khanga aluyimertemi Jalandhar-Delhi highway mokdanga ayuba noksa nung angur.

India nung nisung 26,567 dak Covid-19 potet

New Delhi, Luchii/ December 8 (Agencies): Taoba ghonda 24 tsüngda nisung 27,000 tekübok dak Covid-19 tashidak potetba sülen India nung tashidak menar lakh 97 dak tali kümogo aser tashidak aneper lakh 91.78 jungogo, ta Union health ministry-i metetdaksü.

Kasa mapang nung nisung 385 asüba sülen tang tashi nung nisung 1,40,958 süogo.

Tang tashi nung nisung 91,78,946 anepogo aser iba ajanga national recovery rate

94.59 per cent kümogo aser fatality rate 1.45 per cent nung lir.

Maneni linük nung tang nisung 3,83,866 temang anepaludar, koba total caseload shilem 3.96 lir.

Indian Council of Medical Research (ICMR) sangdong ajanga ashiba agi, December 7 nü tashi nung sample 14,88,14,055 tendangogo aser Hombarnü kija sample 10,26,399 tendangogo.

Tanü nisung 385 dak tashidak potetertem rongnung

Delhi nungi 63, West Bengal 48, Maharashtra 40, Haryana aser Kerala 23 (each), Chhattisgarh 21 aser Uttar Pradesh nungi 20 lir.

Tang tashi nung asürtem rongnung Maharashtra nungi 47,774, Karnataka 11,867, Tamil Nadu 11,809, Delhi 9,706, West Bengal 8,771, Uttar Pradesh 7,944, Andhra Pradesh 7,038, Punjab 4,934, Gujarat 4,095 aser Madhya Pradesh nungi 3,347 densema lir.

Health ministry-i ashiba agi asürtem shilem 70 bo tanga tashidak keta aliba ajanga lir.

Shiv Sena-i kodanga farm laws pumasem: Sanjay Raut

Mumbai, Luchii/December 8 (Agencies): Shiv Sena MP Sanjay Raut-i Mongolbarnü ashiba agi, BJP-i ashiba ama masü saka Uddhav Thackeray-i aniba party-i, Lok Sabha nung farm law asem benokba kodanga pumasem.

Aluyimertem longkak aitba dak sendakba nung Raut-i, Ato Kilonser Narendra Modi mesera Union Home Minister Amit Shah-i, fram law tem anema longkak aitba aluyimertem den sensak asem nung ajungtsü, ta ashi.

Osangbenertem den sensaksemba mapang Raut-i, linük ajunga nungi nüburtemi iba inyakyim pusemdar, ta ashi.

Shiv Sena, NCP aser Congress-i, aluyimba lokti

tentetemi ayongzükba Bharat bandh pusema arudar.

BJP lenir Devendra Fadnavis-i, Sena-i Lok Sabha nung farm law tem pusemogo, ta ashiba Raut-i aitsüba den Uddhav Thackeray-i aniba party-i iba ozüng kodanga pumasem ta ashi.

"Iba longkak aitba sentong nung politics sendaka mali aser malitsüla. Tekelok amadokang, sorkar temulungjang tena lira Ato Kilonser mesera home minister-i aluyimertem den sensaksemba," ta Raut-i ashi.

Fadnavis-i jembiba o dak sendakba nung Raut-i ashiba agi, "ken o tejen ka lir. Onoki iba ozüng ya kodanga pumasem."

Maneni Raut-i, küm ter

tejakdang atalokba indang jembia kazütsü melena BJP-i tang kechi ataloker iba indang jembitsüla, ta ashi.

"Aluyimertem shirnok yimtung nung longkak aitar, parnok ya yimden yimsüsüba dak kecha sendaka mali. Maharashtra (Fadnavis) nung opposition leniri aji angatetsüla. Aluyimertem ket nung political flag kecha mali. Anungji pai o mejembi tsüngda opposition lenir ka ama ter ben bilemdanger jembitsüla," ta Raut-i ashi.

Yimden yimsüsüba toktsür aluyimertemi kechiba parnok teku nung injang achitsüa renema lir, iba indang bilemdangra pai aliyimertem timtem angatetsü, ta pai ashi.

Opposition lenirtemi Tir ajurutsü akok

New Delhi, Luchii/ December 8 (Agencies): Opposition lenirtemi Bodhbarnü aluyimertem longkak aitba dak sendakba nung tir Ram Nath Kovind den ajuruteptsü akok.

Nationalist Congress Party (NCP) tir Sharad Pawar-i ashiba agi, farm law tem dak sendakba nung opposition lenirtem obang ka asütsü atema sensaksemba sülen tir den ajuruteptsü.

NCP dak alia tanga opposition lenirtem rongnung Congress, Communist Party of India (Marxist) mesera India (CPI), Dravida Munnetra Kazhagam (DMK) aser Trinamool Congress nungi lenirtem senden nung adentsü imlar.

Item party tem ajak yagi Mongolbarnü aluyimba lokti tentetemi ayongzükba Bharat Bandh pusemogo.

Pawar dak alia CPI(M) general secretary Sitaram Yechury, CPI general secretary D Raja aser DMK nungi TKS Elangovan-i tir den ajuruteptsü.

Taoba Congress tir Rahul Gandhi-a adentsü imlar, saka tang tashi nung official osang agüja mali.

Mongolbarnü, Pawar-i defence minister Rajnath Singh den ajuruteptego aser

osang ajanga ashiba agi, tena Pune district nung Purandar airport atema ali alizüktsü asoshi sensaksemba.

Aluyimertem longkak aitba dak sendakba nung sorkar aser opposition party tem o agi rara arudar. Union law minister Ravi Shankar Prasad-i Hombarnü ashiba, UPA sorkar kübok agriculture minister ama Pawar-i state dang APMC Act agizüktsü shiogo. Paisa iba temelenshi asem medeni Centre-i senotsü teyari kecha magütsütsü ta shiogo.

Bharatiya Janata Party (BJP)-ia, iba ken o dak sendakba nung pa chief minister asüba mapang shiti züluba tetshia jembogo. Ajisüaka NCP-i ashiba agi, agriculture minister mapa belenzükba sülen Pawar-i, Act benoktsü atema state agriculture marketing board tem shisatsü agitsü atema jaokogo.

Kasa mapang nung taoba Haryana chief minister aser Congress lenir tejen Bhupinder Singh Hooda-i iba farm law agintsü atema Parliament session ka ayongzüktsü khangogo. Paisa, aluyimba nung temelenshi kar bener arutsü nungdaker saka item ya aluyimertem tejangraba temulungdang yur yangluogo, ta ashi

'Iba ya LoC masü,': AAP

New Delhi, Luchii/ December 8 (Agencies): Delhi Police-i Mongolbrnü Chief Minister Arvind Kejriwal house arrest nung mayu ta jangjatsü aser Aam Aadmi Party-i taoba mapang aitsüba tamendakdak maka ta ashiba sülena party-i Kejriwal'er ki police aikanem nükdakja aliba noksa lemsatepba den iba ya Line of control masü ta ashi.

"Iba ya LOC masü. Iba ya CM'er ki. India yimtiba Chief Minister ya dang langa lir na? Pa aibelenji pai India nung aluyimertem pusem," ta party-i tweet asü. AAP-isa, Kejriwal den AAP MP Bhagwant Mann majurutepdaksü ta ashi.

"Police temi CM'er ki meketbanger lir. Nisungtem aitsü, adoktsü memelar. Ajisüaka Police temi kishi züngdang BJP councilors tem longkak aitbabo menokdang," ta party-i tweet asü.

Kejriwal senzusenpongtsü memelar ta AAP-i ashiba Delhi Police-i aija arudar. Delhi indang Special CP Satish Golchha-i, Kejriwal taoba mapang ama dang inyaksangshidar aser pa par

kia toktsüraogo, ta ashi. "Iba tesem yimjung nung toktsütsü aser lendongtsüdong nungi jenboa alitsü atema security aika yoka lir," ta pai ashiba den lenir mesera nisung kar danga senzusenpong nokdangra police temi jenjang tapet agitsü ta ashi.

AAP otongdar Saurabh Bhardwaj-i Mongolbar anepdang ashiba agi, Kejriwal house arrest nung tokja lir aser par kidang teyaritepertem den kidangi aitsü memelar. CM-i Mongolbarnü amentsü aliba senden ajak thitsütsüsa aküm, ta pai ashi.

"Linük ajunga nung aluyimertem pusema nokdakba anogo Centre sorkar home ministry-i Delhi Police dang Kejriwal kimai meyoktsü tuyu. Yashi Kejriwal den pa kübok Cabinet minister tem ajak Singhu arrtsüi oa aluyimertem den ajuruteptba sülen BJP-i aniba Centre sorkar tsübuadok. Kasaji aluyimertem puoka ayutsü atema khen asoshi stadiums teku tepuokdak kümdaktsütsü atema Kejriwal-i Delhi police nem temelaba magütsüba ajanga parnok mepelai liasü," ta Bhardwaj-i ashi.



New Delhi nung longkak aiterem highway nung longkak aitba mapang police temi nüka ataba noksa nung angur. Agir law agintsü khanga aluyimertemi linük ajunga mokdanga ayutsü ayongzuka liasü. Ozüng tasentem ajanga parnok chiyongtsü jenjang ajemtsütsü ta bilema aluyimer meyirejang aikati longkak aitar.



Jakarta, Luchii/Dec. 08 : Surabata, Indonesia nung December 8, 2020 nü medical ketdangsürtemi mashisa tetsürtem dak nungi COVID-19 tendangtsü atema sample agizükba noksa nung angur. Indonesia nung anogo ka tsungta COVID-19 positive 5,292 agi tali kuma tang 586,842 lir aser kasa mapang asüba 133 liasü, aser tang iba tashidak ajanga asüba ajak senteper nisung 18,000 jungogo, ta Health Ministry ajanga Mongulbarnü ashi. Iba virus ya Indonesia indang province 34 prong sünga prokshia lir.

US-i tenokdangba agütsüba aser Taiwan dang hadir ayokba China-i aitsü

Beijing, Luchii/December 8 (Agencies): China nunger ketdangsürtem nem tenokdangba agütsüba aser Taiwan dang military equipment tali ayokba atema China-i Mongolbarnü US aitsüogo.

US-i jenjang balala agiba ya critic timbo Trump administration-i Beijing tali nongshitsü atema benokba ama bilemer aser iba ajanga President-elect Joe Biden atema tesendaktep yanglutsü atema tasakba kümdaktsütsü.

Hong Kong affairs Cabinet office-i, China legislature indang standing committee nungi züngsem 14 nem tenokdangba agütsüba atema kanga mepelaba lemsatepba den iba inyakyim aitsüogo. Item legislature tem yagi taküm küm tetenzüklen Hong Kong National Security Law agizüka liasü.

Kasa mapang nung Foreign ministry otongdar Hua Chunying-i, US dang parnoki tawa Taiwan dang rara nung amshiba hadir balala ayokba anentsü khangogo aser ashiba agi, iba dak sendakba nung China-i telangzüba tapet ka agütsütsü.

State Department-i Hombarnü ashiba agi, Hong Kong nung mepetmesü adokba sülen China nunger nem tenokdangba agütsür aliba nung ano legislature standing committee nungi züngsem 14 züngoksemogo. Tenokdangba agütsüba sülen item ketdangsürtem ya US-i motettsü aser US financial system kübok inyakyim kecha nunga shilem magitettsü. Parnokisa, Taiwan dang USD million 280 alang advanced military communications equipment ayoktsü temelaba agütsüba sangdongogo.

Tir Donald Trump indang administration-i, rara nung amshiba hadir balala 11 ayokba den Taiwan den military aser yimden yimsüsüba tsütsü

tesendaktep yangluba ajanga Beijing mepelar, shirnoki Taiwan ya parnok meyong ta ashi aser nungdak dang süra tashiyim agi atsüngtsü, ta shiogo.

China-i iba asetkong anasa military tayimtsütem inyakyim tali ajungketogo aser arms deal dak sendakba nung densema aliba US company tem nem tapet temerenshi agütsütsü nangzükogo.

Taiwan sorkari iba osang pelashishia agizükogo aser ashiba agi, iba ajanga Washington-i iba asetkong defense nung teyari agütsütsü nangzükba ama inyakdar.

"Anogoshia ama military-i amokmerenba Taiwan-i ajangshia arudar," ta tir Tsai Ing-wen-i Mongolbarnü osangbenertem dang ashi. "Telangzüba agütsüba aser külemi longjemer inyakba ajanga dang iba amala tetsükdaktsü aser amokmerentem koktettsü, koba ajanga iba tesem aser alima ajunga benjar," ta Tsai-i ashi.

US-i taoba mapang National Security Law agizükba atema China aser Hong Kong nunger ketdangsertem nem tenokdangba agütsü, koba civil liberties aginba ama angateter aser ano Xinjiang northwest len lokti nung nütsüng agi ajema aliba Muslim nunger mesenmetui amshiba anema tenokdangbatem agütsüogo.

Taküm US-i Houston nung amenoker aliba Chinese consulate shibangdaktsü aser taoba hopta China yimsü asüba Communist Party züngsem aser parnok kinungertem indang US visa küm 10 aliba nungi ita ka kümtsüogo.

China-U.S. na tsüngdang mangatetep adoker aliba tamajungba kümdaktsütsü atema Trump administration-i, Taiwan, Hong Kong aser

tanga ken o tem amshir, ta China Foreign Affairs University nung international relations professor Su Hao-i ashi.

"Trump-i China-US tesendaktep ka akang akanga yangludaktsüner koba ajanga temelenshi bener arutsü atema Biden nem tetsükdaktsü agütsütsü," ta Su-i ashi.

Trump-i China nem tenokdangba balala agüja inyaksangshiba ya pa mapang ajangtetba ka ama agizüktsü akok, Beijing indang Renmin University kübok School of International Studies nung associate professor Diao Daming-i ashi.

"Iba ajanga tesendaktep yirutsür, linük tem aser lisopurtem tejangrabatem raksatsür aser alima lokti tentetemi imlaba matalokdaktsür," ta Diao-i ashi.

Mount Everest ya asenoki bilemba dang talangba: Nepal & China

Kathmandu, Luchii/December 08 (Agencies): Taoba mapang bilema aliba dang nungi Mount Everest ya talangba lir, ta Nepal aser China nati Mongulbarnü ashi linük ana arrtsü nung aliba alima nung tenem talangtiba asadanga tsütsü mapang talangka nungi mangatetep lia aruba tembangogo.

Iba tenem kolak asadanga tsütsü Kathmandu aser Beijing na opang mapu liasü saka linük anaprongi tenem kolak asadanger yoka iba tenem ya meter 8,848.86 (29,031.69 feet) ta molungtepogo, koba taoba mapang asadanga dang tera agi talangba lir.

Everest ya Nepal aser China tsüngta tatem maka tembar temaitsü ka lir," ta Nepali Foreign Minister Pradeep Kumar Gyawali-i China nunger Foreign Minister

Britain nung nübur ajak atema COVID-19 mozü angur

London, Luchii/December 08 (Agencies): Mongulbarnü arishi küm 90 tain tantsür ka alima nung kanga junga tendangba COVID-19 mozü mezüng agir kümogo, kechiaser Britain nung nüburtem nem ibamozü agütsü tenzükogo, koba agi alima ajunga anokshija arur.

Health worker temi Pfizer aser BioNTech ajanga yangluba mozü ya coronavirus kanga mela menatsüpur nem agütsü tenzükogo, aser iba mozü ya -70C (-94F) nung rizünga ayutsüla, ta ashir.

Margaret Keenan, shiba hopta ka tsüngta arishi küm 91 ajungtsü lir, la nem iba mozü ya Coventry, central England nung mozüki ka nung agütsü.

"Ibai ni asoba anogo nung sempet jelia agütsüba tajungtiba lir, kechiaser küm tasen nung nu kinunger aser medemertem den mapang indoktetsü," ta lai ashi.

Iba mozü amshi tenzükba ajanga alima nung nisung million 1.5 dak tema takum samatsür aliba tashidak den raraba nung teimla agütsür.

Europe nung iba tashidak agi tamajungtiba kongshiba linükji Britain ya lir, kong nisung 61,000 dak tema süogo, aser nübur ajunga nem mozü

agütsüba Western linüktem rongnun par ya mezüngbuba akumer, aser alima nung Pfizer/BioNTech mozü amshiba nunga mezüngbuba alitsü.

Iba mozü ya anaben agitsü aliba nungi mezüngbuba agiba ajanga nüburtem anisüngzük nguaka parnoki tanaben agitsü atema hopta asem atatsüla, aser iba mozü agiba ajanga virus menatepa aoba ajemdaktsüba kuli kecha mali.

"Ibaya ajanga meilongi temelenshi tulu bener arutsü. Saka ne meilongi ta ashir, kechiaser asenok ano alizüng metongtet. Asenoki iba virus madak ano takok mongutet," ta Ato Kilonser Boris Johnson-i ashi.

Health Secretary Matt Hancock-ia küm tatem tashinung nisung million aika iba mozü ya agir alitsü imlar aser iba anogo ya "V-Day" asütsü, ta ashi. Ajisüaka social distancing yimya maneni amshitsüla, ta pai nüburtem dang ashi.

Nisung million 20 tashi agitsü atema Britain-i Pfizer/BioNTech mozü peria mangaa lir. Tashidak nungi kumzükba nung mapa inyakba ya shilem 95 tashi lir, ta mozü yanglurtemi ashi.

Russia aser China nungbo pei linük nung yanglutetba mozü agütsü tenzüka lir.

Wang Yi den video call ajanga jembiba mapang ashi.

Taoba mapang Nepal-i par sasa Mount Everest ya kodanga asadang mali saka 1954 küm Survey of India ajanga asadanga meter 8,848 (29,028 feet) amshia arur, kong rer densema lir.

China-i 2005 küm asadanga mapang tenem kolak ya 8,844.43 (29,017 feet) lir ta asadantet, koba 1954 nung asadanga dang meter 3.7 (11 feet) agi tajemba liasü.

2015 küm Nepal nung menoknok magnitude 7.8 anokba ajanga Everest tenem kolak melenshir alitsü akok, ta tenemi aturtemi ashi. Iba menoknok ajanga Nepal nung nisung 9,000 jungnüa takum samaja liasü.

Ano alima nung tenem talangtiba 14 bo Nepal nung lir, aser pari Everest asadangtsü

atema surveyor tem taoba küm May ita mezüngbuba yoka liasü. Taküm coronavirus mechi iba tenemi atuba nokdanga aliba mapang China nunger surveyor temi tenem ya asadanga liasü.

Iba tenem kolak shidak asadangtsü atema Nepal nunger surveyor temi Global Navigation Satellite System amshia liasü, ta Nepal nung Department of Survey indang odongtar Damodar Dhakal-i ashi.

1953 küm New Zealand nunger Sir Edmund Hillary aser Sherpa Tenzing Norgay nati iba tenem mezüng asadanga sülen linük anatsü nungi nisung 5,789-i Everest tenem kolaki 10,184 ben tudangogo, ta Himalayan Database ajanga ashi. Iba tenem nung nisung 311 shi takum samaogo.

Kibong kümer küm 50 ajungba Tepela Anogo

09-12-2020

Mr. Rongsenchiba & Mrs. Purangla
(Waromung)



Tsurabur arishia yutsüba asoshi onoki Tsüngrem tenüng asanger.

Maneni teyanglur Tsüngremi anema aliba den arishi talang moajang ta onok sarasadem.

*Tanurtem, Semchirtem,
Anükapang aser Kinungertem.*

Kiphire DC indang bungalow semzükogo

Kiphire, Luchii/December 08, 2020 (TYO): Mongolbarnü (08.12.2020) Kiphire nung Advisor, NSDMA & CAWD, Kazheto Kinimi-i Deputy Commissioner indang ki tasenba semzüksüogo.

Advisor Kinimi-i, Kiphire nung alir nürburtem atema DC bungalow tasenba ya Sorkar nungi Khristmas sempet ka ama lir, ta ashi. CAWD department-i DC indang Bungalow yanglutsü, ajisiüka, tang iba bungalow ya Kiphire District nung alir nürburter ajak indang ki ka kümogo, ajiasünung nürburtemi pei indang ama iba ki meima amshitsü asoshi pai ayongzük.

Iba ki mapang shitak nung takok ngua renemtettsü asoshi Chief Minister aser Deputy Chief Minister nati anir State Sorkar ajanga senotsü peria agütsüba den külemi Contractor temi nendaka inyaksüba asoshi

Advisor-i pelaba shisem.

Executive Engineer, CAWD Er. Sungtiba Amer-i technical report agütsüba mapang, 2014-2015 küm iba ki yanglutsü asoshi maparen tenzük. Iba ki jenjang sen lakh 360 liasü aser ita 24 nung iba ki renemtsü asoshi mapang atakzükja liasü, ta metetdaktüsü.

Commissioner Nagaland, Rovilatuo Mor, IAS-i, District pezü nung sütur aliba/merenem aliba DC indang bungalow takok ngua aser tepor junga renemtsüba asoshi Advisor dang pelaba metetdaktüsügo.

District nung alir ajunga ajangzüksü asoshi DC indang Bungalow aser Office ya tajungtiba nung pei indang ama anepalua amshitsü asoshi pai nürburtem ayongzükja liasü.

Kasa sentong nung V. Kashiho Sangtam Minister aser T. Yangseo Sangtam MLA, Pungro-Kiphire nati jembiogo.

Kiphire nung alir nürburtem atema bilemja mapang shitak nung iba ki takok ngua renemtsüba asoshi, V Kashiho Sangtam-i, Advisor Kinimi aser Contractor dang pelaba metetdaktüsü. Tarutsü anogotem nunga maparen tanga nung takok ngua inyaksütsü asoshi pai CAWD department dang mepishiogo. Paisa, district nung alir nürburtem ajangzüksü asoshi Kiphire nung alir HODs ajak dang pei nem lemzüksüba maparen nendak nendaka aser ochishia inyaksü asoshi ajungshiogo.

Maneni, iba sentong nung Chumbenthung Merry, EAC Kiphire menden liasü. Dr. Apise-i iba bungalow meshiteta sarasademtsü aser DC Kiphire, Ajit Kumar Ranjan, IAS-i telok pela agizükba o jembi. James T.Khulu SDO (C) Kiphire-i tepela anküp o jembi, ta kasa sangdong ajanga metetdaktüsü.

DTF Wokha senden amen

Wokha, Luchii/December 08, 2020 (TYO): Mongolbarnü (08.12.2020) DC Conference Hall nung Wokha District Task Force for COVID-19 vaccination, Routine immunization aser IPPI 2020 senden ayonga agiogo.

Deputy Commissioner aser Chairman DTFI, Wokha Orenthung Lotha-i anir iba senden agi, kong teloki COVID-19 aser routine immunization atema tajangzük angutsüper tem jangjatsü, 2021 January 17 nü National Day for Polio sentong amungtsü aser routine immunization tajungba melenshitsu onüktem nung olemtepa liasü.

District Planning Officer (DPO), RCH/VIP member Secretary DTFI, Wokha, Dr. Khelito Zhimomi-i, COVID-19 aser Routine immunization atema tajangzük angutsüpertem dak sendakba nung, GOI-i COVID-19 Vaccine agütsütsü atema maparen inyaksüba aser temzüng agi melaba ama Healthcare workers nem mezüng iba vaccine agütsütsü; iba sülen tanga frontline

workers aser küm telemsa tem achaayanga vaccine agütsütsü, ta metetdaktüsü.

Lai ashiba agi, COVID-19 vaccination campaign takok ngua agitetsü atema tajangzük angutsüper tenüng tem bendentsü nungdaker aser iba inyakyim atema State aser district ajunga nung HCWs, facility site indang bio-data bendentsü tenzükogo.

District level kübok yimsüing shia nung ASHAs aser Jila tesem tem nung AWWs ajanga ki/kilen ka ka semdanga tajangzük angutsüper shia asadangshia tenüng bendentsü maparen ya tayongzükba tulu ka alitsü, aser iba inyakyim atema December 2020 aser January 2021 tashi mapang latetja lir, ta lai shisem.

National immunization (IPPI) Day for Polio dak sendakba nung, lai ashiba agi, 2021 January 17 nü IPPI sentong agitsü aser iba atema mapatong tilaka tenzüksüogo; aser arishi küm 0 nungi 5 kinü tanur ajak nem Oral Polio vaccine agütsütsü.

Wokha District nung tanur 11,337 nem Oral Polio vaccine

agütsütsü renema lir aser vaccination booth 200 dak tema amenoktsü, ta lai ashi.

Iba maparen nung külem sendaktepa alir ajak dang tekümdangtsü sangdongtsü aser iba campaign takok ngua achaayangtsü asoshi line Department ajaki amalitepa inyaksangshitsü asoshi lai ayongzükja liasü.

Routine immunization (RI) dak sendakba nung lai, asenok district telungtet nung routine immunization inyakyim tajungba melenshitsu atema arishi küm 0 nungi 2 tajangzük angutsüpertem tanurtem jung junga jangjatsü kanga dang nungdaker, ta telok dang metetdaktüsü.

Maneni, iba immunization campaign takok ngua ayongzüktemtsü atema Deputy Commissioner, Wokha aser chairman DTFI, Orenthung Lotha-ia, külem sendaktepa alir, NGOs, Tongtibang Lokti tentet, Arogo, village council aser nürburter ajak dang longjemtsü aser District Task Force den amalitepa inyaksü asoshi ayongzükogo, ta sangdong ajanga metetdaktüsü.

DIMAPUR MONGSENYIMTI SENSO TELUNGJEM

Küm Tenem Wasümunng (1970- 2020)

Omen "Towangwangtang"



Onük : Lensen

Anogo : 12th Dec. 2020
Mapang : 10: 00 Ako
Tesentepdak : Cornerstone College, Duncan, Dimapur

Sentong Lennir : (i) Wb. Jungshimanen Jamir
(ii) Kr. Dr. Watinaro Longkümer
Metetpela Zülur : (i) Kr. Yangermenla Jamir
(ii) Sp. Sashitemjen Ozüküm

SENTONG

- Jubilee lapok :
- Mongsenyimti Naklu Ken : Tanir, DMKT
- Tetenzük sarasademtsü & Asür Bilemettba : Rev. Dr. T. Lima Ozüküm
Senso Missionary
- Tarur pelaa agizükba : Wb. Talilemzüng Tir, DMST
- Tepela O : a) Dimapur Ao Senso Telungjem
b) Dimapur Langpangkong Senso Telungjem
c) Kohima Mongsenyimti Senso Telungjem
d) Mongsenyimti Senso Bendang Alir Telungjem
- Temeja Ken : Tayonger : Wabongtoshi & Imjungyanger
- Tongti tesemdanger o aser Jubilee Otsü Kaket sayatsü : Wb. Tongpang Ozüküm
Minister Housing & Mechanical. Govt of Nagaland
- Tajungshi O : a) Mongsenyimti Riongsanger Putu
b) Wb. Sobu Jamir, Advocate
- Kongro Ola : Kr. Chubatila Ozüküm
- Mulungnen O : Wb. A. Senti Ozüküm, Taoba Tir
- Onük 'Lensen' : Sp. Sentilong Ozüküm, EAC
Mokokchung (25 minutes)
- Melepzüng O : Wb. S. Aosüngküm Ozüküm, Convenor
Jubilee Planning cum Fund Raising Committee
- 75 Jubilee Mungger dangi salem shiti : Wb. Repatozüng Longkümer
- Tatem Sarasadem : Wt. T. Atula Ozüküm, Convenor, DMSTT

Mon nung Quiz tetoktepa agiogo

Mon, Luchii/December 08, 2020 (TYO): Mongolbarnü sangoktsütsü asoshi ajungshia liasü.

(08.12.2020) DC Conference Inter School Quiz Hall Mon kübok "Substance Abuse" onük nung ajemdaker School Mon indang kaketshir Inter School Quiz ana Yingmei M.Konyak aser Competition (Mon) sentong ka Lemngang Konyak nati ayonga agiogo, ta sangdong mezüngbuba jenjang nung takok angu. Kasa tetoktepa nung St John Hr Secondary School Mon nungi Niangmai Konyak aser timtem balala agütsüba dak Yingkhao nati tanabuba jenjang aser Kongjong Hr Secondary School Mon nungi Peter mechi, iba quiz tetoktepa sentong ya District Level Committee for NashaMukt Bharat Abhiyaan, Mon ajanga ayongzük.

Mozü tapu balala mashishi achiba ajanga asen temang nung nungi Niangmai Konyak aser timtem balala agütsüba dak Yingkhao nati tanabuba jenjang aser Kongjong Hr Secondary School Mon nungi Peter mechi, iba quiz tetoktepa sentong ya District Level Committee for NashaMukt Bharat Abhiyaan, Mon ajanga ayongzük.

Deputy Commissioner Mon, Thavaseelan K IAS-i shilem agir ajak dang pei pei azüngba shisaliok reju aser lokti nung iba tekümdangtsü osang ajanga metetdaktüsü.

FMSCI nung Gaurav aser Ghosh nati shilem agitsü



New Delhi, Luchii/ December 08, 2020 (Agencies): FMSCI Indian National Rally Championship (INRC) indang aruya aliba season atema JK Tyre lineup nungi nungtugu navigator ana Musa Sherif aser Ashwin Naik den Gaurav Gill aser Amitrajit Ghosh nati shilem agitsü. Iba asayamung December 16, 2020 nungi tenzüksü.

"Linük indang driver tajungtiba ana rongnung Gill aser Ghosh na alitsü. Onok product aser terenlok

maparen nung tena tendangba aser telangzüba ajanga India indang rally saisapong tsütsü jenjang tajungba aser tuluba ajungkettsütsü," ta Head of Motorsport, JK Tyre, Sanjay Sharma-i ashi.

"Onok maparen nung tenati anir shilem agitsü maangka anguba atema pelar. Iba den külemi tang ama tensa tamajungdang, JK Tyre ajanga tenaprongla nungittsü mulungogo, koba India nung motorsport indang patron tulutiba lir aser iba kübok züngsem 24 agi asayamung

tepor jungdaksütsü," ta Sanjay-i ashi.

JK Tyre tawabangba kübok shilem agitsüpur rongnung driver takotet talisa Mangalore nungi Dean Mascarenhas (taoba mapang INRC champion; den navigator Shruptha Padival), Coorg nungi Suhem Kabir, Cochin nungi Fabid Ahmer aser Mysore nungi Syed Salman nung densema lir.

"...Maneni, JK Tyre-isa North East nungi local team pezü nungittsü, kong tetsür temeja team ka densema lir. Tetsür team rongnung Phurpa Tsering den navigator Yashwardhan Kumar, Ms Nabam Asha (Ms Dinky Varghese), Hage Naku (Hage Bitu) aser Pem Sonam (Lenin Joseph) nungeri shilem agiba angutsü aser iba asayamung mapang Arunachal Pradesh nungi fans aikati parnok pusemsü imlar," ta kasa sangdong nung shia lir.

Olympic Games 2024 nung break dancing bendenlok: Thomas Bach



New Delhi, Luchii/ December 08, 2020 (Agencies): 2024 küm Paris Olympic Games indang shilem ka ama saisapong pezü rongnung 'breakdancing' bendenlokogo. Hombarnü, International Olympic Committee-i surfing, skateboarding aser sports climbing den breakdancing bendenloktsü asoshi lemtet, ta IOC President Thomas Bach-i ashi.

Iba saisapong sentong nung sponsor, broadcaster aser tongtibangsa lanur fans tem den tesendaktep yanglushitsü asoshi asaya yimyatem melenshia aser saisapong tasen tem bendenloktsü asadangshiba mapang, International Olympic Committee ajanga telemtetba ya agi. Olympic ayongba yimti nung nüburtemi sapuba saisapong aser saisapong tasentem shimtsü asoshi asayamung ayongzüker nem International Olympic Committee indang temzüng tasen ajanga temelaba agütsüba sülen, saisapong tasen pezü ya taruba Olympics nung bendenloktsü bangjemtep.

Breakdancing mesüra 'breaking' ya 1970s mapang United States nung mezüng tenzü, ta shilem agirtemi kuli agütsür. Hip-hop sobaliba nung breakdancing ya tongtibang wadang ka ama züngshia aruogo. Breakdancing ya United States nung dang masü saka alima tesem ajungalen prokshia lir, kong nisung million ka dak temai iba saisapong nung shilem agidar ta asadangteter.

Mumbai yimti nung '2019 Red Bull BC One World Final' sentong ayonga agiba mapang Facebook aser YouTube densema streaming sabang

balala nung viewers million 50 dak tema atsüa aruogo, ta sangdong ka ajanga metedaksü.

'Breaking' indang tongtibang shilem rongnung, top rocks - tetokteper/shilem agir indang tsüngsangba yimyatem - footwork, power moves aser freezes densema lir. Power moves nung shilem agirtemi 'spins' aser freezes nung 'pose' yimya balala sayur.

'Artistry' aser 'athleticism' densema, tetokteper, shirnok dang "b-boys" aser "b-girls" ta ajar, parnok technical skill nung dang masü, saka creativity aser style den tashi, takara, aser tepor junga tsüngsangba yimyatem asadanger.

"Item saisapong bendenlokba ajanga Olympic Games Paris 2024 ya tepor junga aser mera keta ayongzüksü asoshi onoki imlaa atar. Iba Games asayamung ya senotsü tajemba adoka aser süsümedema ayonga asayatsü atema onoki inyaksü. Iba den külemi lanur aika nem shilem agidaktsütsü asoshi onoki rangloker inyaksü," ta Bach-i ashi.

Maneni, taruba Paris Games atema shilem agitsüpur athlete tem 10, 500 agi ajemtsüogo, koba taoba Olympic Games den medemdangra, athlete 500 agi tajemba alitsü. Iba den külemi Paris Games nung tetsür aser tebur athlete naprongla nem shilem kasa lemsütsütsü. Tokyo Games nung tetsür athlete atema shilem 48.8% lemsükja lir, koba novel coronavirus tenokdangba ajanga iba asayamung 2021 tashi anogo atsülangtsüogo.

Kasa mapang, Paris Games dak sendakba nung weightlifting aser boxing saisapong anaprongla nung athlete timba ajemtsüogo.

BFI indang election anogo atsülangtsür

New Delhi, Luchii/ December 08, 2020 (Agencies): Boxing Federation of India (BFI) elections, koba December 18, 2020 nü Annual General Meeting (AGM) nung ayonga agitsü renem, linük nung coronavirus wara süshia maoba ajanga iba election atema anogo atsülangtsütsü lemtet.

AGM senden ya Gurugram kübok federation headquarters nung agitsü renem, saka "state association shilem timba" kati wara süshia maoba dak sendakba nung ajemdaker election anogo atsülangtsü asoshi tebilemba lemsatet. Taküm September ita BFI elections ya agitsü renem saka Covid-19 tenokdangba balala aliba ajanga iba mapang election ya thina atar.

"Tensa süngjema küma maoba ajanga....BFI indang state associations-i Ld.

Returning Officer, Justice Rajesh Tandon, shiba election ketdang asütsü atema shim, pa dangi iba election thina atatsü asoshi tezüluba ka ajanga mepishiogo," ta tentet indang state aser unit president aser secretary dangi yokba shidi nung BFI President Ajay Singh-i metetdaksü.

Sports Ministry ajanga agizüksü atema, taküm küm tatemlen BFI elections agitsü nungdaker.

"State aser unit temi mepishiba RO (Returning Officer)-i agizükogo aser AGM aser elections anaprongla anogo atsülangtsü asoshi tetuyuba agütsüogo. Iba telemtetba ya Indian Olympic Association ajanga jangjatsüogo. BFI AGM aser elections, koba December 18, 2020 nü agitsü asoshi renem, iba maparen thina atar. AGM aser BFI indang elections

atema anogo balala yakta sangdongtsü," ta pai shisem.

President post atema taoba mapang Mumbai Cricket Association president aser BJP lennir Ashish Shelar-i Singh den toktepa liasü. BFI electoral college nung züngoksemba sülen December 02, 2020 nü Singh-i pa indang nomination file asü.

Arishi küm 48 tain Shelar ya Maharashtra indang taoba sports minister lir. Iba den külemi, pa ya Mumbai District Football Association indang taoba chairman lir, kong iba Association kübok club 350 tashi züngoka lir, ta kasa sangdong ajanga metetdaksü.

Tang Shelar ya Bandra West constituency nungi MLA ka lir.

2016 küm International Boxing Association (AIBA) kübok election achayanga agiba sülen Singh-i president mapa agizüka inyaka arudar.



Phek, Luchii/December 08, 2020: Football coaching camp nung shilem agirtem aser DA & DLCW MSK Phek züngsemtem külemi tangokba noksa ka yangi angur.

BILEMDANGANG

"Tajung inyakdang, lenmang balala ajanga asen dangi temoatsü arur."